

遂

初

堂

詩

集

遂初堂詩集卷之九

台蕩遊草

蕭山道中

溪小恰容舟，舟平可漱流。
近人山色淡，侵夜櫓聲柔。
岸花欹屋，村村樹拂樓。
都忘行驛路，只作輞川遊。

雨

越山吾所愛，一雨罷登臨。
小得蓬窓韻，全乖蠟屐心。
無聲宵漲濶，有影曙峰沉。
好締重來約，情於未到深。

曹娥廟

越國猶聞祠，伍相娥父迎伍君溺死女戎勝算竟如何。
江山欲

洗胭脂辱故遣寒門出孝娥

十四童娥廟食長一江猶借姓名香
中郎老大無英骨
只向殘碑綴末行

門生寧海令辛祇傳來迎爲停十日書壁贈之

君才惜不預蓬瀛猶喜分符近赤城
地僻最宜人事簡
民淳恰稱長官清
褰帷坐對霞標起
拄笏遙看海日生
儒雅定知優吏治
颯颯試聽箏絃聲

一筇踏徧海東頭未到天台不是遊
擬共寒山眠白石
却教關令識青牛
生平懶作諸侯客
旬日聊爲故舊留
賦就金聲能賞歎
草玄有託復何求

客館遇王倩修見示新刻臨別有贈

文詞亦多門賦體最宏濶取材乾坤羅運思造化奪性
靈資陶冶物象賴綜括屈宋鑿鴻濛揚馬揭日月增華
踵六朝魚龍互凌跋唐模苦拘攣宋製傷佻達榛蕪遂
至今不絕殆如髮弱齡嗜纂言銳欲掃荒蕪下筆時斐
然截流不用筏未能追淳古庶可免剽掇舉世悅繁絃
誰爲聽疏越王君雕龍才詞鋒不可遏考古窮根株天
空眼雙豁選賦成一編出入嚴斧鉞胡爲剪華貂而乃
存素褐倩修選古今賦精錄余賦頗多賞音亦良難相思渺天末邂逅
此津亭雄談慰飢渴少作真可悔塵言更當撥行將觀

龍湫因之臥瓊闕冰雪練心胸吐語或奇拔還將擲地
聲慰爾烹魚札

謁方正學先生祠

太平良相學優爲事到艱難節始奇力以一絲維九鼎
忍將十族博專祠潮青綠里啼鵲憐月冷龍岡語鶴悲
後裔可憐仍死國一堂俎豆最相宜

之難十一世孫樹節蔭五經博
士國變不食死竝宜祠龍岡中

躍龍山

一曲清溪抱碧山山頭終日聽潺湲高低塔影殘虹外
明滅墟煙野渡間水堆自春還自應松門無啓亦無關

臥龍正穩誰教躍灑遍甘霖及早還

贈松岩禪師

無錐可卓不妨貧雲壑高眠自在身問臘十圍松樹老
標宗九日菊花新惠持出定仍懷土梵志歸來異昔人
覲面相逢無避處一回鄉語一回親

贈香雪法師

台宗不斷僅如絲海畔欣逢老論師教義瀾翻瓶瀉水
定心清徹月臨池名藍謝却蓬爲屋白拂拋來偈作詩
散誕閑身無一事就談每到竹陰移

贈項潛九

有賜

寒松瘦鶴儼儀型識是天南老歲星度世葛洪還採藥
辭官伏勝但傳經閉關足爲登山健避俗眸因閱古青
欲訊劫灰前際事披榛時復訪雲亭

國清寺

台山一萬重帝割爲佛國刹院如星羅國清最雄特地
從山神獻構自天家力劫火幾創殘規畫猶整飭山門
役神工衆愚淨如拭塔垂三天語松結太古色涵空一
沼清透霧諸峰直大雲昔普雨人華此側塞神龍子其
珠金翅不露翼像教有興衰覺路無荆棘至人每呵塵
對面難測識松門虎一聲喚醒三生黑

金地嶺

九里松風十里泉徐徐送客上青天不知
頂高多少已覺羣峰帖地眠

銀地嶺

誰道山僧徹骨貧眼前大地總金銀我居
五嶺君銀嶺劃破虛空露主賓

高明寺

昔聞無盡師義學之龍虎方振天台宗道風秀南土
竭來造幽溪遺跡猶可覩繽紛雨花堂一燈燦諸祖
教觀羅百家珠淵而玉浦林嵐尤秀絕淡綠藏一塢
山環來

無門溪折去無所寂寂松關春濛濛竹陰午佛入法華
定天開青蓮宇得游非小緣暫面皆夙侶誰舒一握雲
去作彌天雨

佛隴

天台接天姥舊是神仙家葛許諸道流於此營丹砂一
從智者到法鼓雲雷搥判教復標宗巍然小釋迦四衆
歸若海浩浩龍與蛇遂令三珠樹變作優曇花雄剎開
十二修禪爲根芽如何燼劫灰荒碑委泥沙塔院亦荒
落殘僧藝禾麻宗門尚直指經論等土苴寧知止觀義
坦道無岐差正法不終晦至人來非遐佇見乘願輪佛

百重光華

寒風闕

大小寒風闕高高插紫清風來嫌骨重雲至覺身輕借
問趨丹陛何如訪玉京樵蹤欲斷處鹿出萬松迎

天封寺

層巒如驚波琳宮壓其上結構旣崇宏面勢仍清曠胸
臨大壑寬眼到層樓放端嚴前山朝洶湧一溪漲晴雲
俯千盤高松摩十丈笑語飄天風翛然覺神王片石跌
聖僧雄刹自天矧中更幾廢興成毀由心匠賢哉智嶺
尼所作乃過量碌碌豈丈夫臨風默惆悵

貴州魏學士
女嫁爲張總

戎妻總戎死難夫人棄家爲尼號自覺
道行清高實新此刹所居名智嶺菴

芒鞋

一從脫朝靴是足始我有逍遙著方寫濶畧對賓友平
居覺安舒未便涉山阜決策換芒鞋任人笑羸醜梯空
健猿騰履險捷鹿走平凌石齒尖穩踏苔紋厚賈勇傲
山僧得路誇溪叟未知謝公屐輕利有此否萬事貴稱
意飾觀安足取策其先登功錫以竹杖耦汝莫愁出山
棄置同敝帚吾方五嶽遊與汝盟耐久

燒筍

多年不茹葷一飽甘葵藿本欲淡滋味寧復論佳惡茲

辰食燒筍過美非意度嫩如荔新剖脆若藕初削甘芳
無畱滓軟美不煩嚼獨烹謹火候至味謝鹽酪乃知下
方人所啖皆糟粕雜和紛肴蔬坐令真味薄山僧遇居
士作此慰寂寞不供肉食人恐損其脂膜願作台山農
長年分此樂只愁一箸餐減却千林籜

華頂峰

崑崙之脉從天來散作嶽鎮千瓊瑰帝愁東南勢傾削
特聳一柱名天台天台環周五百里金翅擘翼龍分胎
峰巒一一插霄漢澗瀑處處奔虹雷華頂最高透天頂
萬八千丈青崔嵬乘雲御風或可上我忽到之亦神哉

遊氛豁盡日當午洞視八表無纖埃南溟東海白一杯
括蒼鴈宕青數堆千峰簇簇蓮花開中峰端嚴一蓮臺
華藏世界宛如此醯雞不識良可哀渺茫誇閩苑荒忽
求蓬萊何如天台靈異在人境劫火不到無三災神泉
自流琪樹不栽彌山藥草滿谷丹材應真隱顯混樵牧
飛仙遊戲同嬰孩羲之乏靈骨太白非仙才已住神山
却歸去空餘石屋寒蒼苔我已夢覺墻根槐安能更逐
魚龍徑須習定棲峰頂飽看滄桑三百回

茅蓬雜詠

天台六十五茅蓬總在懸崖絕澗中落盡山花人不見

白雲堆裏一聲鐘

獨木爲橋跨澗低古藤綠壁自成梯板墻茅蓋團團屋
不著人間一點泥

坐對千峰不作門雲歸雲出在牀根鳥因就食當簷下
虎爲聽經傍砌蹲

矮屋低簷礙客冠繩牀土竈坐團團定餘滿室生虛白
儘抵三千世界寬

溪山佳處結茅新買地無勞問主人耐得封山三丈雪
從君高臥一千春

巖頭老僧日一粥覆眼蒼眉面如玉更無一事到胸中

閑掃藤花拾黃獨

一卷金經讀未終
客來不起任從容
脫罷袈裟徐作禮
問年笑指十圍松

分齋遠就隔溪菴
汲水樵雲老尚堪
莫訝孤單無伴侶
應真五百是同參

道人家具一瓢輕
獨自安禪獨自行
信宿前山門不鎖
猿公偷點佛燈明

閉關老宿等鴻冥
強爲人牽住祖庭
山鳥溪花紛獻笑
此山頑石比人靈

天柱峰僧餉黃獨

黃獨分來瓦銚邊香於紫芋大於拳笑他懶瓚渾閑事
誤却長源三十年

石梁觀瀑布宿方廣寺

五百仙人果位尊驅來鬼斧鑿無痕山根裂到巖頭合
天上流從地底翻萬丈冰綃懸玉軸千羣浴鐵走和門
斷壑何事畱餘怒終古風雷白晝昏

豈必滌腸訪化城巖邊古寺最幽清僧於紺髮光中坐
客在銀虹頂上行不夏松杉含雨氣無眠樓閣撼濤聲
應真畱我遙招手一墮紅塵便隔生

斷橋

石梁奇共見人到斷橋稀
澗路三春雪山糧一尺薇
泉穿仙掌落石捲渴虹飛
凝綠潭無底沉沉玉漏微

珠簾泉

一片銀河水空懸
珠輕勺落勢緩娟
妙織痕無紋
淚傾千束仙衣拂
冰垂簾應有意
澗鎖龍姝

萬年寺

平田古寺聳層樓
水遶山環步步幽
一壑松杉雲外冷
百函藏剗前畱
賜衣天子難親到
宋仁宗賜衣聖書
有云如朕親到
採藥山人快獨遊
歸路不須愁
黑月孤燈懸在萬峰頭

曾賦禪師

不下台山三十年手栽嫩桂欲參天
撥開古路荆榛裏湧出精藍劫火邊
雙澗傳聲雷吼地八峰聽法雪齊肩
莫愁驕目看雲霧法眼還應燦大千

雨後尋龍湫

探幽不怕雨廉纖踏葉攀藤興轉添
削鋏千尋無路上九天垂下玉龍髯

桐柏宮

我讀坐忘論十年懷子微如何桐栢路
不見綵鸞飛月浸丹泉冷雲埋藥草肥
金庭蕭索甚清淚濕天衣

瓊臺雙閣

瓊臺屹立中天孤削成亭亭不用扶靈芝根莖蒼雪膚
台山之心仙所都百神上下風雨俱積高中央削四隅
俯瞰絕壁臨虛無雙闕巖巖夾雲衢靈溪百轉羊腸紆
繞溪秀盪千芙蓉雲中之君朝香爐玉女鵠立羣真趨
萬玉璀璨萬錦敷老龍守戶垂其胡靈湫百丈山腹劖
猿驚鶴慄無來途而我闢入心膽竄高攀天梯捫天呼
下搜雲窟餐雲腴曷不少畱作仙徒自顧落拓難牽拘
仙班禮法恐不踈不如逍遙作凡夫題詩問天恕狂愚

桃源

桃源無桃花山水乃佳絕始至覺蕭疎漸深愈幽折雙

崖爲曲屏組繡對披列石淨不受苔松清如漱雪山寒
途若窮溪迴境仍別碧潭清若空倒嶺諸峰潔珠簾掛
重重雲際露潛穴仙居旣清高塵滓非所屑如何啓劉
阮世緣忽膠結遂令惆悵溪步步生悽咽可憐欲界仙
情根曾未徹誰能喝金橋道人心似鐵

贈護國寺夢帆禪師

忘山忘院坐逍遙月酌桃溪水滿瓢却怪照師多一喝
眼明從不見金橋

導客重重入畫圖亂雲撥盡碧峰孤杖頭說法人聞否
親到桃源一樹無

寒巖

嘯天獅子最嶙峋，開口平吞摸象人。
雄拔萬山皆奪氣，孤高大士合藏身。
石膚剝盡存真骨，雲頂單棲絕四鄰。
會得寒山詩外句，無邊煙景鎮長新。

明巖

螯龍蟠處不容窺，苦被松門散聖知。
天與石龕裁合掌，神供玉筍只單枝。
壁開削鐵看天小，洞轉旋螺得月遲。
把斷重關無路入，惟餘水索透空垂。

赤城

不共千山疊翠看，獨將秀骨戛雲寒。
瓊樓削出三層峻，

霞彩裝成一色丹影動天風孤塔迴門迎海日兩巖寬
玉京只在人間世未洗中腸欲到難

山頭有峯
狀洗腸井

蒼山九龍潭

芸芸天地間萬族皆可見龍胡獨幽潛出入以雷電幸
存所居潭蹤跡差可辨茲山靈奧區羣龍久分擅或晦
若甕井或明若庭院或爲蜂房懸或作螺角旋側掛藤
橫梁奔衝瀑垂練團團聚荷珠煜煜開鏡而漱不著落
葉清或浮花片如耽谷臥幽似鄙天行踐巖欹路千盤
壁窄天一線晴空蓄風雷盛夏含水霰裂石畱爪痕噓
涎結香片想當開闢初龍德存海甸疏封此名山聽擇

形勢便長擡族屬居不作立黃戰有龍山則靈雲樹常
葱蒨下方苦旱賜精虔此禱與如絲一縷雲霖雨千村
徧我來敢褻脫良用窮神變一嘯沸圓波恍惚鱗鼠現

慧明寺

台遊例不到蒼山我爲耽奇肯憚艱觀瀑淡穿棲鵲嶺
尋僧遠扣宿雲關聖師遺蹟麻牋古閨代甯鐘碧蘚斑
寺有智者大師手書方等院
羅尼經及石晉天福年間鐘同是林梢出明月清光絕
勝在人間

贈天台令董怙蟾

紫府瓊臺第一山羨君爲吏在其間鳴琴人似仙班靜

羅雀庭如玉局閑課種每於金地立行泉時到石橋還
與公正有芒鞋約賦草憑君燭下刪

贈方方山

六十三翁尚黑頭健於蒼鹿逸於鷗山當絕險皆親到
寺最荒寒亦熟遊詩好半題臨洞壁書工每署看雲樓
一生占斷台山長那羨人間萬戶侯

贈馮再來少司空

槐棘班中卑乞身高情逸致渺無鄰謝公屐向登山健
白傅詩從入社新遺事網羅皆史筆名園點綴亦經綸
飽看宦海風波濶始羨仙山穩坐人

題修稷圖

人生作官如飲酒美醞誰能不沾口但令薄醉味有餘
無取昏酣到濡首東門二疏稱大賢右軍誓墓何其堅
急流勇退世有幾漏盡夜行良可憐臨海馮公信人傑
轉日移山樹勲烈飽看世路足風濤苦憶家山好雲月
開府侍郎官不卑蒼鬢黑頭身未衰早謝巖廊臥林壑
功成身退何悠哉赤城仙山連葢竹萬年藤杖千年鹿
彭澤柴桑多故人荷衣皂帽相追逐一觴一詠樂天真
藉卉攀蘿忘主賓詩成不讓蘭亭稷畫就長畱輞水春
試看朝市紛紛者正逐空華奔野馬秋風吹老不歸來

孤負尊絲滑盈把

柏貞詩爲李節母作

雙鸞珠樹正和鳴豈料霜颺一夕驚謝女已甘臨穴死
班姬終爲撫孤生丸來熊膽心同苦剪就冰花影共清
綽楔褒旌還有待且憑銀管播芳聲

贈洪虞鄰若阜

台山嶠而浚台水清且駛其人尚節槩自昔多君子
謁來見南沙素心淡如水早爲名省郎萬事咨伯始閩南
作監司嶽嶽著風紀讀禮不復出強壯謝青紫卅載臥
家園竿牘絕片紙唯當國兵荒蠲賑談娓娓著書高等

身燦然有條理考古洞淵源論事達國體發語必破的
所向無堅壘志乘尤簡核激揚有浚旨具此學與識何
慚古良史通才老林間堪爲廟廊恥客居了無事秋山
對隱几追涼展新書快若哀梨美側聞東壁樓藏書富
宛委懸知去梯讀百城脫如屣

題陳寒山畫像

古來學道人所貴徹生死一身既能捐何節不可砥取
義與成仁儒釋同一軌陳公生不凡徵夢寒山子因自
號寒山學佛通宗旨而不毀世相卓犖工文史才華發
性靈忠孝致素履釋褐宰江干政績多可記遊讒乃林

居跌宕頗自喜及丁國步艱慷慨起田里奮摩魯陽戈
誓雪會稽恥崩天莫能支臣力盡鬪靡一死從彭咸寺
沼爲止水水淺復雉經從容等脫屣寒山古聖僧再來
竟有以得非現儒宗解終而行起理事兩無礙真俗何
彼此來往乘願輪屈伸一彈指我欲拜孤墳霍霍雨不
止我欲訪遺文故宇無一紙幸得披畫圖瀟灑風神美
前身與後身月影寒潭裏

鴈山百詠

鴈宕山名勝至多一峰一石各自標奇非大篇
長律所能綜括若賦此遺彼則星漏實多因就

遊屐所到各題一絕意有不盡則疊二疊三以至於十凡百題得詩百三十首其非所日觀與目覩而不知其名者皆不及詠以俟後遊焉

老僧巖

一峰卓立亂雲中
圓頂方袍面面同
欲表鴈山爲佛窟
先於谷口露真風

石梁洞

巖腹穹窿古洞開
暗泉垂乳滑莓苔
飛梁百尺橫空跨
疑是蒼龍飲澗來

謝公嶺

謝客才名滿世間，雜心未許扣玄關。一生不得參蓮社，
覲面仍教失鴈山。

蓮運求入蓮社蓮公嫌其心有不許

寶冠巖

石骨峻嶒盡裂麻，森巖羽仗對排衙。峰巔爾得天冠在，
瓔珞時垂五色花。

含珠巖

石闕嶙峋不可梯，更懸危石拒攀躋。仙關何事煩蹤鎖，
恐有靈文秘紫泥。

雙筍峰

雙筍織織玉削成，望如駢榦却分莖。籀龍正有參天勢，

又被春雷一夜驚

照屏巖

鬼斧何年劈巨靈
方巖萬丈插青冥
百神端笏朝炎帝
絳闕中間卓玉屏

初月洞

洞口彎環似月牙
隔林看去隱殘霞
簷端片石垂垂覆
倒挂芙蓉一簇花

嘆頭巖

嶽嶽鋒稜肖鐵冠
彈時猶自帶霜寒
千尋壁立無階上
影駭溪龍不敢蟠

石龜巖

石龜昂首入層空
俯瞰諸峰勢獨雄
儼似牙門排劍戟
中權一燕擁元戎

靈峰寺

看山看到靈峰寺
始覺天公是幻師
幻出千峰如蜃市
教人難畫復難詩
偶來絕境暫盤桓
便覺身輕插羽翰
羨殺山僧高掛鉢
一生長是倚簷看

羅漢洞

裂石千尋洞腹寬
金容肅穆坐層欄
電光一線天門闕

遙見瓊樓濯露寒

踏盡飛梯透卷簾
須知洞頂卽峰尖
若於雲表承清露
何似天心吸水簾

鳳凰峰

威鳳何年下覽輝
翹冠獨立羽葳蕤
丹山未若靈山好
莫戀將雛又北飛

五老峰

五老駢肩復接蹤
披雲拂露意從容
想因貪看諸峰巧
不覺年深亦化峰

南碧霄洞

玉洞陰涵太古春石膚皴裂作龍鱗
鱗間大有題名在
得到仙山總俊人

靈芝峰

亭亭獨立狀靈芝轉側看來面面奇
選盡千峰無比秀
石如能妬亦孤危

蹲虎峰

舊訛山君百獸尊
嘯風一蹴上天門
自從聽得靈山法
歛盡雄心帖地蹲

駱駝巖

常看駝脊峰相似
今見峰形曲似駝
穩臥綠蘿芳草裏

遂初堂集

台蕩遊草

七

肯隨鐵騎渡交河

鬪雞石

力角雌雄未可量
剽姿悍氣略相當
天雞不入開元隊
萬仞岡頭作鬪塲

利牙峰

石作牙鋒銳不羣
豁開巖罅透蒼旻
嚼雲漱月偏高潔
懶與頑仙作齒芬

果盒巖

圓石中分一線橫
磨盤果盒總堪名
獨將渾璞參芒穎
奇陣中間出正兵

風洞

列岫中虛一穴通
溫涼不斷四時風
莊生放筆談天籟
不解于禺出此中

照膽潭

一碧涵空水至清
秦宮照膽鏡分明
靈鱗不肯貪香餌
獨自潭心掉尾行

白雨潭

潭懸飛瀑響如雷
入夜常如驟雨來
幾度夢中驚起看
一泓明月浸蒼苔

觀音峰

遂初堂集
台蕩遊草

大士化身千百億石能肖像卽安名鵬哥童子初無意
亦藉天工巧塑成

北碧霄洞

孤標一笋入天心笋內空涵玉洞濠楚宇中藏看不見
鐘魚飄出海潮音

將軍石

碧霄院對數峰佳簇似笙簧衆管排頂入青天同一色
終年不受白雲埋

大筆峰

獨管踞抽銳復圓寧誇入夢大於椽仙家別有凌空手

畫出卿雲綉九天

真際寺

澗路陰森萬木稠無塵古寺最清幽
山僧不見但供茗滿院蛩鳴如早秋

五馬峰

穆王八駿何曾到漢武千羣豈得來
獨有馱經諸駿骨嘶風盡日對香臺

石碑巖

岱頂曾看沒字碑此巖鐫削復因誰
磨崖肯辱斯高手待勒新宮絕妙辭

頂珠峰

圓石誰將峰頂安
情知不落亦孤寒
漢皇要吸三霄露
特敕金人捧玉盤

淨名寺

淨名寺路最蕭森
門掩松篁積翠深
頭白山僧藏古蹟
烹泉掃石與披尋

荷葉峰

亦名眠牛峰

削立孤巖千丈餘
寧知巖脚四垂虛
但延日月無風雨
天與禪人作淨居

霞城嶂

斑斕紫翠一屏懸
髮髻殘霞襯碧天
不似赤城純赤色
薄施丹彩更鮮妍

石城嶂

石作連城澗作濠
巖巖萬雉插天高
城頭不測何仙住
時有香風墜碧桃

水簾洞

洞懸巖乳石縈纒
迸落幽泉脚散垂
竟日漏痕聞點滴
長如簷際雪消時

一線天

洞對圓峰恰一丸
露天如月蝕將殘
從來遊客靡疎甚

只向山根仰面看

維摩洞

高俯諸峰一洞尊
雲淋泉井儼然存
維摩說法人聞否
削壁中開不二門

仙人橋

懸崖斷處仰攀窮
忽見飛橋架半空
畢竟升天還有路
仙衣輕颺六銖風

藥杵峰

銀漢低垂繞碧纒
清光不礙月闌闌
一從竊藥姮娥去
玉杵拋來別殿寒

行道廊

樓閣天成衆寶坊更標一徑作迴廊
蜂根瘦削蓮花蒂千匝經行繞蒂長

響巖

雙崖束斷白雲層聲蓄拱中出不能長
嘯劃然山答響只疑天際有孫登

聽詩叟

山頭石丈不凡姿側耳掀髯愛聽詩
泉瀨松風真妙句點頭惟有此翁知

臥龍溪

送希生集 一 卷之三
三
數里清溪湛若空
龍鱗細蹙白蘋風
不辭百過寒裳涉
身在銀河皓影中

鐘鼓巖

天然鐘鼓肖形模
長爲靈山倒剎扶
萬丈華鯨俱毀到
不知能毀兩巖無

寺爲土人所廢鐘亦遺烹

鉢盂巖

雞足山中藏不住
詎那掌上託還來
當前應器無人執
天與飛泉洗鉢來

展旗峰

橫崖千丈映朝暎
大旆當風獵獵翻
舒去卷來仙掌裏

掃清雲霧豁天門

天柱峰

孤標一柱混茫中不與修織衆笋同
大巧并無彫鏤迹擎天畢竟是誰功

雙鸞峰

籠篔玉笋上無梯頂有雙鸞彩翮齊
揀盡瑤岑與珠樹孤高只愛此峰棲

玉女峰

雲鬢玉骨淨無塵帝女高居迥絕鄰
不比巫峰態妖冶幻將雲雨惑騷人

獨秀峰

千尺亭亭立不欹
端嚴勁直自天姿
貞臣播笏風標似
玉筍中間第一枝

卓筆峰

筆端銳欲掃千軍
卓立蒼崖秀不羣
盡日書空人不見
石飛泉立總奇文

平霞嶂

削成丹嶂界青冥
錯錦堆霞燦一屏
端笏衆峰旁拱立
諸天於此作殊庭

小龍湫

坐聞雷雨響晴空望若青天挂斷虹
攀盡危崖泉始見飛揚縹緲總隨風

非煙非霧結成團亂迸明珠著面寒
噴落九天無倚著一回飄灑一盤桓

龍鼻泉

畫龍畫盡蟠拏勢不及天然石骨奇
尾卓雲中垂一爪儼如潭底攫珠時

石能透孔龍方活孔解懸泉鼻始靈
迸出蒼龍真玉髓九霄仙露共清泠

玉骨青涵碧辭滋日移松影滴遲遲
故將一顆懸珠貴

鬪取千尋裂帛奇

龍蟄溪山不記年尚能噓氣作靈泉
風雷有日冲霄去
一滴還堪潤八埏

天聰洞

靈洞無蹤不可尋亂披榛莽入峰陰
巖欹壁窄蛇行上
透入峰心卷耳深

洞頂窮時恣孔明恣間樹影翠交橫
下窺一穴溪無底
見說潛通到赤城

踏盡天梯最上關只言此境少人攀
苗常好事先於我

斜刻題名碧蘚間

洞中有苗伯起
常賈臣題名

僧拜石

片石輪囷作勢奇，老僧參請具威儀。
清狂我亦如顛米，見石還多獨拜時。

蟾蜍峰

海上靈姿見玉蟾，何因高踞此峰尖。
月中涼影貪相對，時有銀光透碧纖。

安禪谷

坐有盤陀飲有泉，天成石室好安禪。
不知寶掌生千歲，此地端居幾百年。

靈巖寺

靈巖坐擁衆奇峰天下名藍無此雄可惜劫灰零落盡
把茅孤露畫屏中

見說枯僧解說禪郡侯新與買山錢我來不遇空題壁
自拾松薪煮瀑泉

石屏風

山因遠寺半無名萬笏千珪盡削成喚作石屏殊樸魯
圖經誰與細搜評

小剪刀峰

織女朝朝理七襄裁成雲錦爛天章倦拋玉剪凌空墜
猶帶霞紋五色光

觀音髻

海舶看來第一峰
翠如螺髻縮重重
只愁絕頂窺難見
每被閑雲盡日封

芙蓉峰

列筍中間秀一峰
含葩欲綻玉芙蓉
白雲如水天如蓋
人在金臺第幾重

雙髻峰

佛頭青出白雲均
雙髻盤盤覆玉毫
真相由來難見頂
更無人測此峰高

獅子鼻

象切堂裏
台寫旌草

獅子橫身古路邊
雙懸鼻孔漫撩天
洩雲吐霧多靈異
膽落妖狐不敢前

飛來羅漢

應真亦自愛仙山
一葉浮來住不還
萬仞頭看飛瀑
絕勝危坐法筵間

誦經巖

日照香臺霧不生
忽聞天上誦經聲
何方童子棲巖頂
水月光中自在行

羅漢寺

谷內鐘聲谷外聞
寺藏松檜路難分
山僧不乞人間米

自决清泉種白雲

滿川笙鼓鬧龍舟何似仙山頂上遊一鉢伊蒲分佛供

薄雲疎雨看龍湫

時值滿節

戴辰峰

南紀山高戴北辰煙籠霧蓋看難真何當直上峰巔望
大地平鋪作白銀

火焰峰

羣峭都如火樹炎茲峰焰動更纖纖化爲慧炬燈燈續
無相光中有妙巖

燕尾潭

重重飛瀑穿巖下，恰到潭邊燕尾分。
影落寒潭清徹底，還如白燕掠蒼旻。

斤竹澗

澗名曾入謝公詩，白日清湍信可怡。
方竹一枝僧斲贈，丁寧莫過化龍坡。

能仁寺贈漢梅禪師

芙蓉古剎萬山尊，不斷心燈聚此門。
寶所可憐逢壞劫，八菴零落一鍋存。

頭白梅公住祖堂，十年辛苦架空梁。
知君有意爲全了，緣薄唯憑願力長。

常雲峰

常雲高峻切蒼穹絕頂常教紫霧籠
偶遇晚晴都揭露
帝青寶簇玉盤中

天柱峰贈雲峰禪師

古刹銷沉已百年團焦新構碧溪邊
休公遁迹耽吟眺
樹下題詩葉作箋

雲舒雲卷本無心門草無妨一丈浚
解弄無絃琴一曲
詎那尊者是知音

錦溪

清溪無草亦無沙石齒鱗鱗削玉斜
倒臥龍湫天上水

縈成綺練激成花

千佛巖

一簇雲屏秀蔚藍
齊抽玉笋碧氍毹
千華座土標千佛
誰住童真得徧叅

樹巖

嵩山漢栢枝如鐵
岱頂秦松幹若龍
不似茲巖偏怪偉
雲皴霜剝百千重

道松澗

洞敞懸崖俯萬松
松陰不隔翠微峰
老僧畱我銷長夏
冰滌肝腸雪鍊容

瑞鹿峰

不見熙寧古道場
枯楓亂竹鬱蒼涼
山頭瑞鹿還岐嶷
獨自銜花供法王

閻王鼻

醜石枯槎怪百端
鐵圍變相畫應難
何人摸得閻王鼻
劍樹蓮花一色看

大剪刀峰

障日危峰掠面來
銛鋒搖動合還開
霞紋嵐彩朝朝變
知是天公費剪裁

側對橫看步步移
石帆天柱一峰爲
夏雲善幻應如許

不道人間有此奇

鐵城嶂

削壁爲城黑四圍日臨鐵甕澹無輝行當骨冷神寒處
忽見長虹捲地飛

大龍湫

聞說龍湫瀑布雄一回親見詫神工懸空瀉落無根蒂
廬嶽天台迥不同
輕於霧縠薄於綃碎剪銀絲萬萬條倒捲迴飛難著地
層層盤舞下三霄

澄潭數畝傍巖開水注潭心響若雷躍起更爲衝激勢

鷗馳霧捲逐人來

忽爲直瀉忽橫鋪
谷口風來應嘯呼
忽更斜飛無處所
隨風散作滿天珠

空靈變幻總如神
天上生龍不可馴
說與世人渾不信
漫誇玉練與天紳

水簾谷

左壁千尋飛瀑下
右巖數點水簾垂
天公手筆嫌重複
故裂輕綃作散絲

詎那亭

大阿羅漢心無住
亦愛龍湫面壁觀
一定千年猶未起

誰於耳畔指輕彈

觀不足亭

左看天柱右龍湫天下神奇指掌收盡道一生看不足
何人信宿此淹留

石門潭

削立雙崖闔扇開飛泉百道蹙轟雷石痕盡作盤拏勢
曾透乖龍爪甲來

相傳石門
是龍觜

獅巖

巍峩當路一獅踞萬虎千熊氣欲吞不是空王調御力
便應騰蹠到天門

象巖

截流香象勇無遮穩臥滾山獨蛻牙肯戀金門三品料
隨他仗馬共排衙

望天貓

畫貓未若茲峰肖聳耳昂頭喚不回莫是空中有天鼠
騰身欲與捕除來

鴈湖

鴈湖盡道險無倫荆棘漫山古路湮畢竟登山須到頂
何妨身作鑿空人

苦雨連綿應禱休一僧作導便堪遊貫虹射石憑吾勇

無宿無餐百不憂

越嶺踰溪路幾盤攀藤梯石不辭難一筇透入狼狐穴

羸得樵夫膽亦寒

歷盡懸巖與削崖天棺橫塞峻無階奮身獨上三千尺

點額餘人不得偕

山絕處名天棺

透過重關路却平翩翩真似御風行蒼龍脊上飛騰過

方見澄湖一片明

九天之上九淵藏此理憑何著揣量始信西荒星宿海

河從地湧發源長

湖是靈湫碧一泓只嫌葑草作叢生何當淨洗淤泥出

夾鏡交光相照清

誰道經秋鴈始來只今棲宿不曾回裂雲飛起一行去
久斷人蹤應見猜

萬山帖帖海沉沉身在瓊臺俯首臨一嘯天風飄下界
却疑雲際有龍吟

塔寺平沉語浪傳臥雲縛屋住經年
明季臥雲禪師曾結茅湖畔未
能遺世棲峰頂暫作瑤池半日仙

自性沙彌導游鴈湖酬以二絕

舉世無人識雁湖小師奮勇破荒途五丁一斧盤叢闢
驚起眠龍與宿鳧

重重扶我過危巒，歷盡孱顏不覺難。
親濯湖波唯爾我，世人都向畫圖看。

重過大龍湫觀瀑布

久住欣逢宿雨開，仙山一去幾時來。
龍湫飛瀑真尤物，更著芒鞋看一回。

急雨連宵捲白波，瀑添新漲勢傾河。
一潭盡作明珠沸，飛沫飄來隔岫多。

卷煙成片雪成團，滾滾從空落玉盤。
更被瞳眈晴日照，珊瑚網映碧琅玕。

瀑噴巖頭幾丈離，循巖側立看方知。
更於湫內憑空望，

天際龍騎冉冉垂

扶隱披潛薄有情巖腰高處見題名白雲巷路無人識
恨不龍湫背上行

重過靈峰寺

雁山名蹟披尋遍回看靈峰畢竟靈却似讀殘諸子史
重翻莊論與騷經

欲去還逢宿雨留細評泉石是良謀梯航他日重相訪
何似衝泥更一遊

清籟軒贈曇芳上人

泉響松濤入夢清夜聞風雨曉還晴道人面壁終年聽

聽到無聲始識聲

贈栢林上人

傾蓋相依總宿緣
最難山水共周旋
與君旬日同遊展
三笑爲圖好竝傳
燒笋烹葵味不窮
苾芻真率是家風
他年一枕仙山夢
長在靈芝瘦影中

白溪出山

白溪新漲白於煙
猶是靈峰澗下泉
十里雁山遮復露
多情相送到江邊

乍來直似逢仙偶
再到應如遇故人
莫漫登程悵離別

別時重見轉鮮新

贈東甌守劉裕公

永嘉風土最清嘉雅稱君侯擁絳紗
夢草詩成賓從服
換鶯書出吏民誇海雲飛處頻開閣
訟牒空時早放衙
最是心清堪臥治隨車靈雨沛桑麻

單騎行田鳥不驚評泉品石最多情
龍湫曉立看虹飲
玉甌宵暇待日生屬吏每叅文酒會
新詩常對簿書成
風流文采如蘇白不使前賢獨擅名

李烈婦

烈婦吳氏樂清貢士李應官之妻
戊子歲避亂

平陽過芙蓉江被掠欲自沉恐不得脫乃採簪
珥散擲兵爭攫取之遂躍入水死時李生在玉
甌蜂夢婦泣語曰君在此吾已至蕭家渡矣亟
歸求屍果得之蕭家渡逆流四十里經十日顏
如生

羅陽山頭虎怒嗥橫陽江邊人遁逃兵來截江若風雨
殺人不殺紅顏女李家新婦閨中英求死不得機智生
亂擲釵鈿餌貪卒躍入江心葬香骨江流赴海如驚弦
風濤茫茫去無邊如何烈婦屍逆流上清川夢告良人
山之顛經旬如生神凜然乃知貞魂毅魄死不滅訶護

蛟龍召霜雪君不見清風嶺曹娥渡千秋下拜人無數
更添烈婦廟蓉江夜夜潮頭拍天怒

平陽學博沈升孜招飲署齋

愛君官舍似園居雲入軒窓鳥下除畱客江天梅熟後
開尊竹閣雨涼初清宵正好談山水冷署猶賢對簿書
爽氣朝來情不淺門生隨處擁籃輿

嚴九臨見贈長句走筆答之

嚴安才藻重蘋洲年少翩翩負笈遊賓館有魚千里近
海天多雨四時秋贈來佳句珠盈把看盡奇峰月滿樓
乍辦芒鞋能試否攜琴同上雁山頭

仙巖飛瀑

仙巖飛瀑天下雄，溪山第一題晦翁。我浮扁舟溯新漲，
溪迴谷轉聞疎鍾。龐眉導師此卓錫，芟除榛莽開琳宮。
相逢一笑如夙契，孤筇導客穿雲松。奇峰齧天虎牙豁，
怒瀑震地雷車轟。渴虹千尺挂天矯，冰綃百幅懸瓊瓏。
時隨迴颺濺飛沫，梅天疎雨飄濛濛。更尋雷潭攀絕壁，
巖腹囊剖中嵌空。俯窺沉沉黑無底，轉石下墜聲鏗鏗。
遙看白波落雲際，龍鬚冉冉垂天風。三潭境界各清絕，
水壺洗面雪濯胸。我登雁山及玉甌，已詫鑿剗煩神工。
不圖南遊復見此，天公巧幻真無窮。禪師兀坐萬緣息，

話到山水還飛翀選徧千巖獨棲此詎那觀瀑將無同
一宿繩牀冷心魄朝來欲別愁匆匆奇峰秀壑領不盡
剪取匹練懸窓中

寶巖十景

石門鎖翠

石壁暗藏門遙看絕塵鞅唯容透關人披雲自來往
雲端化城

秘洞穿天心飛樓排月面撥盡萬重雲別峰許相見
北峰春秀

峰峰遙拱抱嵐翠日鮮新不斷花開落長留萬古春

東谷夏陰

大地皆炎蒸此中獨涼冷人境兩忘時爐炭成氷井

西崖秋爽

西山如畫障挂我矮簷端落盡蕭蕭木蒼然玉骨寒

南屏冬日

蒼崖不耐冷曝背過三冬透漏真消息梅花破雪封

中臺夜月

何地無明月閑看只此臺清光與孤影徹夜兩徘徊

靈谷傳聲

懶與世人談聊共片石語問答無異音歷然具寶圭

石燄流霞

奇石卓巖邊，織織欲刺天。一從成慧炬，無復劫灰然。

青蓮吐瓣

一片亭亭秀，分來千葉花。八風吹不墮，長傍法王家。

羅隱洞

五洞開何代，隔林清磬聞。細泉荷卷露，疊石菌堆雲。訪古留鴻爪，登危趁鹿羣。黃梁炊正熟，一鉢與僧分。

次韻酬天目和尚

三過本覺堂，披老真仙才。三到芙蓉亭，龐公絕點埃。而我無寸長，但愛捫蒼苔。喜遇補衲翁，虛空能剪裁。跨海

漉金鱗彌天搆香臺仙巖遂三至松月相徘徊瀑流灑
飛雨潭石鳴轟雷一一皆妙諦何人不心開飄然孤鴻
去瞥爾閑雲來去來長不隔法幢永無摧

陸蓋思學博招飲署齋

永嘉舊是人文地博士元非簿領官署近洞天雲結蓋
家依講舍杏垂壇異書銷夏搜殘帙薄俸畱賓罄一餐
見說鍾爨詩品細敢將敝帚與君看

酬鄭孝先林天杓

偶爲看山到永嘉欣逢二妙盛才華詞雄梅雨千重濕
筆爛江天五色霞拔幟已留空壁壘潛鱗寧久臥泥沙

海邦大雅今寥落著述應須滿一車
題名北雁兼南雁落屐松臺復吹臺多愧子長真史筆
更慚弘景是仙才新知樂似奇書獲好句驚如異錦來
千里盍簪良不易布飄臨發轉遲回

贈陳星槎

能詩善畫白頭翁意匠真堪敵化工蜃海煙霞生筆底
龍湫巖壑幻胸中經鋤有子身堪老絹鞞爲材道不窮
贈我雁山圖十幅歸裝習習有清風

贈章下巖

傷

多才何意謝浮名廿載江湖橐筆行社預香山身未老

詩畱翻水句逾清依人詎肯輕彈鋏著錄還應做輟耕
擬共仙山徧遊覽紫苔浚處竝題名

遂初堂詩集卷之十

閩遊草

江行雜詠十首

五年不上富春江，買得漁舟恰一雙。
小拾詩材儲篋笥，平鋪畫卷對船窓。
輕裝未別千松嶺，遠夢先尋七里瀧。
萬里一槎高興在，衰遲未遣壯心降。

綠滿秋江泛醞醅，相風欲動早潮催。
過雲山似褰帷出，裂水帆如破陣來。
南國初寒楓未脫，殘秋逢閩菊猶開。
尊絲滿地無人採，畱佐詩翁漱澹杯。

江山船製似鯁魚，廣腹低舷帖水居。
掬手清流堪滌硯，

推蓬斜日好攤書
近人鷗鳥衝煙下
侵夢濤聲撲枕初
偃仰此中差不惡
雞栖猶勝趁朝車

雙槩夷猶弄晚晴
桐廬水色湛空明
涵將疊嶂不勝碧
涉盡千江無此清
莎草最憐波底活
遊魚可羨鏡中行
羊裘只合綸竿老
多事君王記姓名

映水連村樹樹紅
霜餘烏桕勝丹楓
山添艷冶浚秋後
天借繁華落木中
高下關情憑夕照
淺深相間有疎桐
山家愛種非無意
怕見春條轉眼空

蓬窓兀坐日蕭蕭
靜閱楞嚴百妄銷
風起秋心生箬笠
雨餘清韻憶芭蕉
排沙淨揀斑紋石
撥火溫蒸嫩藥苗

金馬五堂成底事荷衣隨分且逍遙
繫纜長松復短松鄰船不約每相逢
戍樓警夜無全柝
山寺驚寒有斷鐘舉酒酌江憐月白
引裘加被覺霜濃
曉行慣逐篙師起恐失前山翠幾重
遲速江行不定程
纔看潮落復潮生
風來岸岸隨帆轉
灘至篙篙與石爭
快似玉鞭馳駿馬
險如鐵甲陷重城
年來閱盡榮枯事
順逆區區總不驚
一鈎涼月篋殘秋
欸乃聲中宿雨收
佳醞乍來中戶喜
名灘欲過長年愁
圖經疎謬誰當補
文獻凋殘未易求
寶婺括蒼名勝地
迴帆須作判年遊

天與濤狂福不慳無邊風月柁樓間
秋林疎瘦郭熙樹曉景熹微馬遠山
身退江湖原自濶心空日月本長閒
此生已辦終焉計不上浮槎卽閉關

溪行雜咏十首

仙霞南下無平陸盡日盤迴亂石間
已遣道旁堆犖确更教波底盡孱顏
強拖舟入裁通水意擬溪行却在山
巔石韶瀧稱絕險何曾得似此間關

豸角牛頭險不禁最難防是乍浮沉
橫槎曲檻欄江密銳石斜礁隱浪淺
柁轉數彎危走馬船投一孔狹穿針
任驅鬼斧難疏鑿設險由來造物心

走馬穿針
昔灘名

樟灘塔嶺遠知聞溪別東西險不分錯落八行魚復陣
縱橫千隊水犀軍彌陀漚曲船磨石黯淡瀧高浪切雲
直過龍津始空濶盤渦猶作滿川紋

快意驚心是下灘逆流爭似上灘難攀躋分寸愁欵岸
跌落千尋畏急湍進艇恰尋危石罅牽絲遠上碧雲端
關風伏雨如添勢尺步真當濫瀕看

溪船一例號清流窄船身短短頭門小不容舒眺望
蓬低裁足展衾幃臥看書卷聊排悶側聆雲山薄解愁
白舫青簾元不惡問君何事客炎州

閩山秀削復葱蘢夾岸臨溪紫翠重船轉不時逢削壁

雲開有意露奇峰青無頃
龍岡竹老謝樵蘇冠嶺松
豈獨武夷誇勝妙一丘隨處可支筇

清絕延川好溯洄舟行百折與千迴
山如襟袖交加掩水似羊腸宛轉來
蒸紙績麻人樂業挾書懷槩士多材
炎方信是知春早十月江梅已盛開

水市山村舊不貧年荒兵後少居民
燎薪野岸客防虎打鼓濺更巫降神地
僻不曾疎漢法山濞或恐有秦人
解刀買犢須良吏寒谷先噓煖律春

天南風物異中州披葛經旬更著裘
跨水有橋皆覆屋傍村無戍不爲樓
榕陰愛向當門綠蘭草偏宜出谷幽

只有難爲傾耳處，禽言人語兩啁啾。

關嶠兵戈實飽經，昔年文獻久凋零。麻沙舊刻無完板，
徽國元孫僅一丁。訪古殘碑時洗剔，懷賢短棹漫淹停。
二毛漂泊風霜裏，誰識荒江有客星。

長至後二日汀州傅浣嵐太守招同郭外看梅爲

賦長句

臨汀冬月天新晴，江梅破萼霜花輕。郡侯心閑足幽興，
招客同作探梅行。初出郊原見浮白，漸穿籬落披繁英。
一夜天花綴林滿，千堆香雪填村平。鋪茵花下看逾好，
問爾花開一何早。暖律能爭造化先，貞姿故敵冰霜老。

我行梅嶺不見梅江鄉正月花含胎寧知汀南甫長至
千村萬落參差開使君宦遊廣見此歎奇絕而我懷鄉
人把甌不忍折興來更上最高峰下看香海煙濛濛一
聲鐵笛喚么鳳走報素女瑤臺中琪花萬樹墮塵世得
非有意誇詩翁上林盧橘能夏熟曷不徙植明光宮

再同浣嵐看梅分賦

嶺上驚看一樹新寧知爛熳此江濱香風十里尋來遠
雪片千村綴著勻不共春葩爭艷冶偏將冰萼鬪精神
憑誰寄與孤山去腸斷天涯瘦影人
使君瀟灑足清歡減從攜尊到藥欄細弄玉簫驚魄醒

高擎銀燭照粧寒
夢回仍有香侵袂
賦就何妨鐵作肝
堪笑揚州老何遜
惟將東閣一枝看

朝斗巖和韻

削壁懸崖路幾盤
丹樓迥歷玉闌干
山緣拱北星辰近
地更無塵竹柏寒
俯視斗城青杳靄
平臨香海雪瀾漫
汀流何事偏南下
天與危峰障急湍

坐斷松門一百盤
無心與世更相干
苔封繡壁乖龍睡
月浸空亭石佛寒
遊屐到來霜葉擁
樵踪歸去暮雲漫
算來銷夏無如此
閑掃桐花漱碧湍

送周龍客遊三山

司農厚德繫人思，公子翩翩玉樹枝。
燕去烏衣無舊業，花生彩筆有新詩。
薄遊一棹江楓冷，爲客三冬嶺雪遲。
及見郎君騎竹戲，康成老去淚如絲。

謂陳園門人黎槐曾

明燈官閣敞華筵，送爾清溪穩放船。
劔浦過尋蓬矢地，龍客生於延平榕城到及早梅天。
旁搜軼事添家傳，細錄豐碑副史編。
持節故人情不淺，謂臬司汪梅菴可能葛帔不淒然。

寶勝菴

數弓精舍俯寒漪，借與維摩半榻宜。
蔬笋齋分香鉢裏，鐘魚清徹夢迴時。
不須懸畫山園屋，正好觀心月在池。
料得萬家塵擾擾，此中幽趣少人知。

遊上杭金山作

汀南山萬重紫金特雄秀拔地千芙蓉一石所鑿就無
峰不峻嶒有穴皆透漏陽岡覆浚松陰崖瀉奔湏磴道
歷百盤闕天始出牖垂頭看雲霓舉手摘星宿琳宮三
四區層疊綴巖岫金殿在上方排雲出華構境寂鐘魚
清山寒竹柏瘦更上越數峰嵐閣豁晴晝汀流曲若環
杭城錯如繡遙青辨粵東遠黛入江右山顛涌靈泉一
泓清可漱神龍灑爲霖亢旱資補救良金閉古坑支石
發新竇天空萬象殊地迥百靈輟我來有夙緣勝侶欣
邂逅藉茲眼界寬一洗塵土陋重遊未可期欲別詎忍

驟長嘯下天門白雲攜滿袖

中峰寺

蒼山峻出白雲端喜有精廬絕壁安坐處不知高萬仞
到來惟覺路千盤飛泉響落晴壑雨古木陰濃夏亦寒
善畫也應難著筆奇峰盡日倚欄看

寄題圓通寺

圓通閣在萬峰顛大地平沉別一天寶刹重重開梵網
奇峰面面簇青蓮三災不到清涼界萬法俱融透徹禪
擬學淵明來入社欣逢惠遠虎溪邊

劉幼儀假翫文石詩以酬之

物產信多奇怪石非一狀茲石出江心品列巖岫上滄
波久涵漫銀礫相摩盪輝輝月魄融藹藹玉色盎雕鏤
非人工渾成自天匠面如老僧趺背若團扇障竟體作
奇文貝錦詎可况天風翻大波魚鱗蹙細浪形雲夾日
看朝虹亘天望大巧樸而文千年閔龍藏漫爲田父得
終作詩翁貶人顛粗似米石古合作丈珍護過天球摩
挲手不放知我嗜奇者借觀索新唱山齋十日畱把玩
傾家釀愛其秀潤極儼如壁人傍未敢久淹閣主人恐
惆悵題詩送之歸此君幸無恙

遊水南梅莊

九十日春五十雨落盡梨花不出戶朝來晴霽天氣新
屢誤遊期尚堪補良朋入座無多談芒屨相將遊水南
水南杭川最佳地三折中間一洲綴人無別業專藝花
萬木陰森翠無際竹籬茅舍百十家家門前鋪落花
人意蕭閑物態靜衆香國土無塵沙竟日盤迴綠天裏
俗籟凡襟淨如洗轉入梅莊更豁然池館清幽花竹美
高樓正對紫金山尊嚴如王不可攀七峰峻嶒聳豸角
美女娟妙低煙鬟城堞參差露華棟倒影波心欲浮動
清溪約山平不流風帆煙鳥紛相送主人好事挈榼來
清言雅詠相徘徊劃然長嘯山答響遙勸山靈酒一杯

大冠修劍足荆棘青門紫陌多塵埃童冠風詠有天趣
而我不樂何爲哉如此山川良可懷重遊但願風日佳

美女峰

聳翠清溪上亭亭十一峰欹斜偏有態淡冶爲誰容石
竹含煙潤山鵲帶雨濃攀躋不到處雲外一聲鐘
愛向濛山宿都無俗累牽僧房危石底客枕濕雲邊幽
境欲無夢清言易入禪雨歸沾濕好巖瀑百重懸

普陀峰

客居苦岑寂青山差可交普陀有佳色不與羣峰泝策
杖恣幽討微徑緣巖磬奇石作人立清泉疑虎跑萬松

攢一翠白日行林梢老僧遺世者蓋頭以把茅枯木憑
作几真棲如鳥巢風磴陟百層古殿藏雲堦石瘦足香
茗潭淡有潛蛟臨眺窮下方綠樹間丹苞秀野錯若綺
重巒疊成爻攀登不知疲我友攜行庖醇美識家醞芳
辛辨山肴觴詠竟日夕悠然謝喧曉浮生草上露世事
風中泡奈何縛名利窟如雀黏膠高懷寄山水古意存
陶匏且舒孫登嘯休解楊雄嘲

贈汪悔齋年友

海內論知已休陽洵絕倫崢嶸經世業磊落濟時身霜
柏儲才大鋸刀淬鐔新升朝以文學報國用經綸奉使

窮漠外宣威絕島濱天心眷英略俗態薄文人出守官
仍絀孤忠道竟伸冰壺懸皎潔玉柱聳嶙峋葺屋歌廉
范 楓宸簡寇恂超遷予持節重寄表全閩察吏六條
肅平刑九棘均小心精法比明目廣咨詢奏讞釋之允
平反定國仁外臺無滯獄一路少冤民涇濁滔滔浪幾
馳哀哀塵子身爲砥柱雅志在埋輪力撥朱絃正潛移
黍谷春具僚資表率薄海荷陶甄豈意鄒枚選居然羊
杜鄰人材那可測吾道未全屯憶昔同升日恭逢戡亂
辰闕門求俊又側席待沉淪禮過徵黃綺人如得毅辛
殊榮開禁近異數寵儒紳虎觀聯翩入 天顏咫尺親

卷綉金匱秘饌給尚方珍賦擬追揚馬書將敵范荀蛾
睂原易妬龍性况難馴蘭忌當門種魚憎出隊鱗未須
辭諤諤已覺習申申射影機關巧摧幢放逐頻不才甘
瓠落朽質自輪囷一鍛蓮山羽長依笠澤尊分畦菽藥
草芟徑理松筠跛脚攤書榻蒙頭漉酒巾採奇窮岳竇
訪古徧齊秦命駕時千里掩關或百旬著書希待後味
道欲尋真散木安濟斷羣材歎積薪幾多隨逝水強半
逐漂蘋瓜摘愁連蔓花飛少墮茵棄捐非

聖主袞濯盡貞臣賴有垂天翼高翔橫海津從容調玉
燭取次轉鴻鈞岐鳥祥因鳳郊蹄瑞爲麟一夔堪補袞

六逸且垂緡嶺路峰如繡溪灘浪似銀黃甘香掩冉紅
荔熟圓勺偶想班荆話聊爲下榻賓非君敦夙好古調
若爲陳

西禪寺啖荔枝作

荔枝信仙品色味香三絕所貴餐鮮新風韻天然別陳
紫與方紅名種漫標揭經宿椰變改徒勞遠提挈我思
就樹餐好友相贊決長慶古道場林澗地幽潔有荔枝
百株森若翠蓋列壽者或千年磊砢見高節丹苞綴離
離綠雲點猩血畫筆染不成清香隨風徹須臾摘滿籠
露珠尚停結徐徐絳囊剖宛宛輕綃掣冰丸映若空瓊

漿逆欲裂綽約素膚凝晶瑩玉肪切無滓入口融有液
沁脾冽清疑仙掌露涼比天山雪誰誇葡萄甘詎數楊
梅熟一餐此奇勝餘品皆凡劣楓亭與漳浦佳種人競
說安得到彼中芳鮮親採擷歸來北窓眠餘韻猶在舌
萬事貴掇新轉眼菁華竭可憐華清宮殘腊猶阻嚼

汪悔齋臬使餉楓亭荔枝疊前韻

荔支貴佳種凡品乃懸絕譬如王謝兒超然氣韻別上
產出莆中品第舊譜揭楓亭近得名筐盛與籠挈珍重
獻上官疾走須踵夙一宿香未變露頰猶新潔外人希
得嘗庸品漫羅列汪公吾故人官尊到持節饋遺却銖

黍謂是民脂血薦新獨留此愛其芬芳徹憐我渴相如
分餉慰煩結堆盤千火齊餒綃不畱掣入手玉彈圓落
喉冰漿裂核小吐若無肉厚脆可切哀梨遜爽美綏桃
讓甘冽人言荔帶酸得此在始雪如對藐姑仙一洗俗
腸熱如騎汗血駒一空凡馬劣真味祇自知雋永那可
說驛致尚如此何況披露擷不虛萬里遊仙味幸霑舌
羣公侍金門奏草才思竭徒聞貢生荔一九焉得啣

閱曹秋嶽先生與陳伯騶荔帖中有長句推重及
余輒步原韻志感兼與伯騶索荔

海天一鶴孤飛迴故人珍重芸緘開先輩風流見遺墨

水壺濯露無纖埃折節窮交若昆弟百念灰冷惟憐才
角險爭奇必移晷手摘天葩賤凡綺目空萬馬無神駿
謬賞名駒足千里富平之李松陵潘南北詞壇相對起
獨鑒惟同老友論狂瀾思用一柱砥哲人去矣蓬山遊
鳳毛鴻爪人間畱志業蹉跎負知已瓢笠剩與江山謀
飽啖荔枝思勝盡有同拔士須拔尤惡君遠餉勿謙損
品第曾經第一流

勝盡荔枝名
出長樂

簡陳伯騶兼索長樂荔枝 曹溶

好風吹送吳船迴柳花如雪山房開四海何曾慳武
庫一方且得除昏埃赤豹眠雲閑浚壑青芝映日憎

儿才志士不樂玩修晷須向詞場刷几綺富平李君
擅長句秦關擊柝動千里陽九生才每不窮潘生近
自松陵起過此江河看善下雖有巨障莫可砥子將
訪友更遨遊我獨奚爲畢歲畱草衣掩泣馬廐下飽
啖荔枝非人謀閩南此果倫雜誰握冰鑑登其尤
頰玉克盤却驕暑雲峰高瞰洪濤流

伯騶餉長樂荔枝懃前韻却寄

江船侵曉乘潮迴封題鄭重筠籠開殷紅照眼三百顆
驅珠出水鮮無埃一嚼冷然賞高韻林下風骨神仙才
清香襲人欲移晷涼入詩脾濯錦綺蘇門逸豔對孫登

洛水清遊共千里佳處可領不可說
水落山空見雲起
光音天人厭地肥乞與瓊瓌齒一砥
消渴文園已倦遊
端爲此味成淹留君家久住荔陰裏
掩露而食誠良謀
紅塵中人夢不見利名渴死天何尤
期君更作釣鼈約
蓬瀛濯足清淺流

遊鼓山憇白雲廨院

暫歇籃輿步石梁院門古樹綠千章
僧來雲窟衣衫潤
客飯榕陰几簟涼百道飛泉歸絕澗
一聲清磬出新篁
人生豈合埋塵土世味何如道味長

湧泉寺

山行不見山，澗松覆如幄。滴翠沾人衣，晴雲時滿掬。修
磴延清風，危亭肆遐矚。忽聞鐘魚聲，招提在巖腹。規制
特崇宏，威儀殊肅穆。客至浩如歸，旋汲新泉沐。院主法
臘尊，道風聞九牧。軟語接凡夫，劒鋒不可觸。山空月華
朗，夜靜天香馥。自然生道心，無勞遣塵俗。高齋涼如秋，
一榻清寐足。可歎市朝人，紛紛夢蕉鹿。

喝水巖

鼓山厚而藏，茲巖特呈巧。山骨露無餘，削成類天造。兩
崖劃崇甯，一澗鑿澗沼。石奇天卓笏，木古龍垂爪。靈境
開鴻濛，殊庭割昏曉。仄徑循懸崖，下闕絕壑窅。清泉吐

龍頭餘潤滋苔草，廣亭可盤桓。炎威失如掃，攀蘿過石門。
道窮出雲表，落日照江洲。毫末皆可了，此地信名區。
來遊古不少，題名石如林。爵系半可考，筆蹤儼猶新。其
人骨已槁，未知天地間。何物差難老，百年駒隙中學道。
苦不早曠觀，發遐思與言。勗同抱。

國師塔

一枝聖箭透重城，千載南荒祖令行。無縫塔中標塔樣，
隆隆石鼓半天鳴。

鳳池菴

行盡茶園到鳳池，山巔奇絕貯清漪。靈禽乍浴人稀見，

僊藥叢生僧不知雲戀塢潑遲出岫竹當峰缺早抽枝
寒山去後豐干老懶惰無心覓虎騎

白雲洞

石洞肖獅口本是雲所居山僧占之住厦屋寬有餘雲
意未忍別賦質幸清虛共住亦何礙來往成相於徘徊
几榻間乍卷還乍舒我來值雲去餘潤猶在裾垂頭看
下方川原綺繡如榕城十萬戶照耀日出初樓臺及門
觀歷歷掌上臚有時片雲起大千覆須臾浩如泛瀛海
獨立騎鯨魚茲地洵幽迥泉石亦不殊賴有雲變化奇
態難爲書割贈諒不可僧云祇自娛

登劣崩峰絕頂

北溟之魚南溟鳥飛騰變化窮八表吾生何爲居甕中
百年甘作醯雞老所以登山必登巔欲舒雙眼青霄邊
鼓山之頂出雲際眺望可盡東南天我來值晴明萬象
何澄鮮山川見條理原隰分術阡南條之山盡闔嶺奔
騰到海何雄猛龍蟠虎踞開名都萬壑千峰脉井井重
江西來匹練長迴環曲折趨大荒日照遙沙作金色窮
溟無際青茫茫粟散百千國浮沉海中央蓬萊清淺几
幾度仙人頻見還心傷下視榕城青一簇摩肩轂擊爭
相逐王圖霸業總成塵達者觀之蠻與觸誰能徑上七

金山大千世界臚掌間淨居天上清涼境豈風吹墮何時還

再宿列祖堂

山徑涼無暑虛堂夜更清風來天界濶月到上方明勝友無凡語高僧不世情汲泉烹茗罷團坐話無生

本是清齋客貪來佛地居戒香薰鉢衲塵夢警鐘魚祖位燈相續開山後共八十五代禪師禪鬪箭不虛周何同有累勇割

意何如

贈爲霖和尚

龍象凋零末法秋一尊古佛在南州昔將一雨露羣品

牢把重關截衆流

和尙不怪付囑故云

石鼓傳聲雷震地金輪坐

斷雪盈頭永明筆舌慈明眼度盡衆生願始休

吸江蘭石

樹合疑無徑峰迴忽有菴江光變牖得雨氣石林含屋
小偏空坐僧孤似可談廢樓應就此彌勒許同龕

題武夷萬年宮

路接仙源步步幽瓊宮滿穆梳丹丘陰澗萬樹深藏殿
翠掃諸峰半入樓薛壁題名龍漢劫羽衣吹笛洞天秋
羣仙小別經千載試下虹橋話舊游

十月望日同劉涓生徐肖未諸子宿天游閣

夙聞天游奇今識天游路胡麻澗裏曲磴藏仙掌峰巔
孤閣露地高復在山中央俯看翠岫兒孫行九曲溪環
盡縈折三台峰對無低昂我來恰值風日美落照層層
見蒼紫須臾皓月行空天白浸千巖淨如水地主好事
攜尊來一掃萬古塵襟開濯魄冰壺不知冷天風載我
浮蓬萊欹枕不成寐喔喔天雞聲披衣推戶翫落月寒
煙漠漠埋山平鷓鴣天地不辨色但聞溪灘流水鳴琮
琤東方日高嵐氣伏漸漸峰尖露微綠忽濃忽淡鮫綃
橫乍合乍開波浪蹙飯罷游雲始盡除山川揭露轉清
耀佳士彈冠新沐後美人櫛髮曉粧初六六奇峰甲閩

嶠茲閣居中領其要四時明晦總相宜
雨岫晴巒盡靈妙雲海今朝成大觀
何當終歲此盤桓未飲刀圭先換骨
此身已在白雲端

壽黎愧曾

我行數千里恨不見偉人文獻茲凋殘
往事誰討論汀萬山中地樸民風淳
乃有黎大夫孺然靈光存公少盛文譽
華星燦秋旻早射彤庭策司李饒江濱
冰壺凜清操斷事明如神治行推第一
單車入西秦揚旌烏鼠月駐節崆峒
春三選按靈武寇亂方紛紜畫灰決軍
事舉扇清邊塵功高賞不酬強健遽乞
身高臥龍山陽悠

然對松筠林居十六載無書到金門我昔仰風概雲龍
不可親茲來接親誨溫溫如飲醇門風比萬石鄉里推
荀陳著作爲必傳老筆彌清真只今杖國年髮鑠無與
倫香山樂池上放翁老山村天畱不盡福晚節揚清芬
丈夫壽千古葬華安足羣但能書琬琰何必圖麒麟